



20. august 2020

UKA 2020/79

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nipilersortartut immiussinissamut aningaasartuutaannut 10.000 kr.tikillugu tapiisummik misiliutaasumik 2021-miit augustip aallaqqaataani atuutilersussamik Naalakkersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarmissaanik siunertalimmik. Misilittagaalersimasut nalilersuinissamut atorneqassapput avammut tunisassiornikkut kiisalu eqqumiitsuliornikkut siuariarsimanermut sunniuteqarsimanersut.

(Inatsisartunut ilaasortaq Aqqalu C. Jerimiassen, Atassut)

Tunggavilersuut

Nipilersortartup kissaataa annerpaaq suua? Tassaavoq tusarnaartoqarluni appisimaarnissaq, kiisalu immiussinissaq. Ullutsinni saqqummersitsiniarneq ajornartorujussuuvoq tusaamasaariingikkaanni, allanartumillu nipilersoriaaseqaraanni.

Pikkorissorsuarnik piginnaasalinnillu nipilersortartoqarpugut, nukiummat annertoorsuarmik suli atorluanngisarput. Paaserusupparput qanoq tapeeriaasitsinni qanoq tulluunnerusumik naapertuunnerusumillu sulissuteqarsinnaanerluta, simmasinnerusumillu atuussinnaatitsisumik. Taamaalillunilu nipilersortartut ukunani pioreersuni qinnuteqarlutik itigartussaagaluartut, soorlu Kultoorisiornikkut aningaasaliissutaasartuniit. Kiisalu saqqummersitserusullutik saqqummersitsivinnut ikittunnguusunut saaffiginnittuartsimagaluarlutik itigartarsimagaluartut nammineeirlutik periarfissarsiorlutik suliaqarsinnaalernissaat anguniarlugu.

Massakkut saqqummersitsiviusuni anginerpaasoq qinnuteqarsinnaasarpog, saqqummersitassanullu inaarinnissinnaarusullutik taperneqartarlutik. Taakkulu saqqummersitsivikkut immiunneqartartut qaffasissumik pitsaassuseqarnissaq siunertaralugu immiussisarfvimmi nipiliorfusinnaasumilu immiunneqartarput, ilinniarsimasunik pikkorissunillu immiussisulerlutik. Tamakkiisumillu taamatut suliaqarneq aningaasarpurujussuarnik naleqartarluni. Taamaakkaluartorli saqqummersitsisarnerat imminut akileqqarluinnartarluni. Nipilersortartullu tassangaanniit saqqummersitsisinnaasartut ikittuarannguullutik.



Nipilersortartut nalunngilaat qanoq ajornarluinnartiginersoq Kultoorikkut aningaasaliissutiniit taperneqassalluni. Kodamiillu taperneqarnissaq aamma ajornakusoortarpoq qinnuteqartut amerlasangaarmata, ukiumullu 100.000 kruuniinnaat agguanneqartarlutik.

Nipilersortartut nalunngilaat nipilersortartunut CVR atorfissaqanngitsoq. Nipilersorfinniit aqqissuisut CVR atoqquneq ajorpaat. Bandiullunilu CVR-qarnissaq aamma iluaqutaanngilaq nipilersoqatigiit allanngoqattaartarmata. Nipilersortartullu ataasiakkaarlutik CVR normoqassagunik, assersuutigalugu nipilersoqatigiinni arfineq marluusuni fakturat arfineq marluk aqqissuisumut nassiuqqartariaqassallutik.

Nipilersortartunut CVR atorfissatuaq tassaavoq qinnuteqarfissaq ataaseq, annertuumik projekteqarluni, nittarsaanermut, nunarsuarluunniit tamakkerlugu angalaarniassalluni aningaasarpassuarnik qinnuteqarfissaq.

Nipilersortartullu nalunngilaat annikitsumik qinnuteqarfissamik annertuumik pisariaqartitsineq annertusoq. Assersuutigalugu annikitsumik tapiiffiusinnaasoq 10.000 kr missaani. Taakkulu immiussisup suliarinnittulluunniit akissarsinissaanut atorneqarsinnaassallutik, immaqaluunniit immiussisarfirmik inimilluunniit attartornissamut akiliutissatut, illoqarfigisami nunaqarfigisamiluunniit. Tumerparpaat allallu nipilortussanut immiussiniarnermut ini tulluortoq aamma pisariaqarsinnaasarpoq, immaqaluunniit mixerisussamut masteriisussamullu (nipigissaasussanut). Immiussinermilu saqqummersitsinissamut pisariaqarluinnartut pinngitsoorneqarsinnaanngitsut arlaqarput. Soorlu digitaliusunut ikkussuiniarnermi akiliutissaq, Spotify-uppat iTunesiuppalluunniit, aammalu soorunalimi aamma cd-nik naqiterisitsiniarnermi.

Sineriak tamakkingajavillugu immiussisarfeeraatillit amerlaqaat. Sumiiffimminni nunaqqatitik immiussinnaalissagaluarpaat ajornanngitsumik annikitsumillu taperneqarsinnaalerunik. Immiussisarfiaraatillit suliarfik inuusutissarsiutiginerulersinnaavaat, nipilersortartorpassuit saqqummersitsinissaminut periarfissagissaarnerulissapput.

Ersarissumilli oqaatigilara, ullutsinni immiussineq saqqummersitsinerlu aningaasarsiutaanngilaq.

Eqqaamassavarpulli cd-p piuneerukkiartuaarnera, pisiarineqassaariartuaarneralu. Ullumikkut cd-t pisiarineqartartut ikittuararsuupput, kopeerisartut amerlagamik, atortorissaarutillu qarasaasiat interneti streamerisarnerup downloaderisarnerullu ineriartupiloorneri ilutigalugu. Taamaattumillu akilersinnaasumik amigartoorfiunngitsumillu saqqummersitsinissaq ajornartupilussuulluni.

Aperisoqarsinnaavormi: “Soormi cd isumalluutigineqarsinnaajunnaarsimappat digitaliusumik saqqummersitsiinnarunik?”, ilumut, ullumikkut suli cd aningaasartuutinut matussusiinnaasutuaagallarpoq. Erinaq streamigassanngorlugu Spotifyimut ikkukkaanni, ataasiarluni



tusarnaarneqarpat 0,04 centimik naleqassaaq, tassa 0,0004 dollars. Assigiinnarpaalu 0,003 kr. Immiussisimagaannilu 10.000 kr aningaasartuutigalugit, aatsaat 3 millioneriarlugu tusarnaqqaarneqartariaqarpoq Spotify isumalluutigalugu aningaasartuutit matussuserniassallugit. Immiussisimagaannilu 100.000 kr. Nalinganut, tassa immiussiviup attartorneranut, immiussisup akilerneqarneranut, saqqassaa, mixerneqarnera mastererneqarneralu ilanngullugit, aatsaat 33 millioneriarlugu tusarnaarneqarpat aningaasartuutit matussuserneqarsinnaalissapput.

Taamaammat nipilersortartut ilungersunartupilussuarmut inisseqqapput, pingaartumillu nunatsinni. Takuteqqiinnarpaalu annikitsumik tapiisinnaanissamut pisariaqartitsineq qanoq annertutiginersoq. Taamaaliornikkullu nipilersoriaatsit allat tusarsaavallaanngitsut aamma periarfissaqarnerulissagaluarpur, massakkut tapeeriaatsip ilusilersugaanera pillugu, saqqummersitsiviit pioreersut akilersinnaasutut nalileeriaasiat pillugu, inuit 60.000-t ataallugit nunatsinni amerlassuseqarnerput pillugu, ilisarissatsinnik pisoqqasaalaannguanillu nuannarisagarnerput pillugu.¹ Pingaartumillu nunarsuatsinni atuisuusugut nipilersukkanik tusarnaarnissamut akileerusukkunnaarsimanerput pillugu. Naak inuuneq naallugu sungiusarsimagaluarlutik, ukiorpassuit ingerlaneranni erinnat erinniaallutillu taalliaagaluartut, iluatsitsillutik namminerlu akileeqaataallutik immiussillutillu saqqummersitsisimagaluartut, atuisut taakku erinnat inuiaqatigiinnut “tunissutit” isigilersimavaat.

Taamatullu nutaamik tapiissummik pilersitsinikkut sinerissami immiussisarfeerallit amerlasuut akilersinnaanerumik suliaqarsinnaalissapput.

Ullumikkut kulturikkut inatsimmi, aningaasanullu inatsimmi taamatut ittumik tapiissummik soqanngilaq. Taamaammat kulturikkut inatsimmi inatsisitigut toqqammavilerlugu una aallartisarsinnaanngilaq. Kiisalu toqqammaviummik finanslov aqqutigalugu inatsisiliortoqarsinnaanngimmat, Atassummiit isumaqarpugut taamatut misiliutaasumik misilittakkanillu katersiffiusumik aallartitsisoqarsinnaasoq, ataavartussamik pilersitsinissaq pitinnagu.

Aningaasatigut ingerlatsinikkullu pisortanut kingunerisassai:

Misiliutaasumik aningaasaliiffissatut aaqqiineq ukiuni marlunni katillugit 300.000 kr.-it aningaasartuutaassapput. Kiisalu aallartisarneqarnerani suliallu ingerlaarnerani allaffissornikkut ukiumut, AC Fuldmægtigep ukiup affaatut naleqartumik suliaqartinneqartassasoq naatsorsuutigineqassalluni, tassalu 500.000 kr.

Namminersortunut aningaasarsiornikkut allaffissornikkullu kingunerisassai:

¹ <https://da.uni.gl/media/259711/den-groenlandske-musikbranche-under-forandring.pdf>



Amerlanerit saqqummersitseqattaalernissaat siunniussaavoq. Ilaasalu saqqummersitsereernerup kingunerani tusarnaartitseqattaarsinnaalissapput, suliassaqartitsinermillu kinguneqarsinnaalluni. Siunertaavortarlu sinerissami immiussisarfiutillit amerlanerusunik suliassaqarsinnaalernissaat.

Innuttaasunut aningaasarsiornikkut allaffissornikkullu kingunerisassai:

Soqanngilaq.